

sullen sy gebin vnsern schuburten zcu Pirne eyne scheffel vm drittehalbin groschen vnd den sal man nicht zcu cleyne slon. Were abir, daz vnse burgere bedarften kalkes von der stat wegin, so sullen sy y gebin sechs malder vm eyn schog groschen. Were abir, daz ymant welde buwen in der stat zcu Pirne, deme sullen sy gebin eyn scheffel kalkes vm eyn groschen adir fuff malder vm eyn schog groschen alz veil alz her sien bedarf. Obir daz habin vnser burgere globet, daz man dez gutes nicht furen sulle obir sy zcu Pirne in dy stat, is in were denne, daz sien gebreche, wen sy ere czins lute sint vnd gebin der stat alle iar vier vnd drisig groschen czinses von dem czigelofen of sente Michelstag. Were, daz vnse hern of dem huse adir vnser goczhuser zcu Vnser frauwen adir zcu sente Niclus buwens darften, do vlechte wir vnz nicht in ane alz veil eren czigelofen; ab sy sien enperen mogen, sullen sy lyen zcu Vnser frauwen vnd zcu sente Niclus, were abir, daz sy sien nicht enperen machten, so sullen vnser vorgnanten goczhuser burnen vnd ouene gewynnen wo sy mogen, do sullen sy ere gunst vnd vorderunge zcu gebin. Waz ouch kalkes adir czigels den selbin goczhusern obir blibet, daz sal man in zcu haldene gebin vnd daz sollin sy wedir gebin den selbin goczhusern, wen sy is bedorften. Ouch sollen sy alle ding halden noch der burgere rate. Dez zcu eyne waren beken- tenisse vnd bevestunge diz brifes vnd alle deser vor beschrebin rede habe wir vnser stat gros ingesigel losen hengen an desen keginwartegin offin brif, der do gegeben ist noch der geburt Cristi driczenhundirt iar dor noch in dem nün vnd ahezegisten iare an dem nehsten donrstage noch sente Mathis tage dez heilegin czwelfbotin.

Nach dem Orig. im Rathsarchiv zu Pirna. Das Siegel ist abhanden gekommen.

No. 55. 1389. 5. Juni.

*Willkür über Gerade und Heergewäte.*

Wir Henczel Helfer burgermeister, Friczko Dytrichspach, Petirman, Petir Lorber, Petir Holuchske, Hannos Flachs, Nickel Rober, Henel Crippin, Andrei Winkeler, Ticzko Scholters, Ticzko Melling vnd Franczko Helwieg gesworn ratmanne der stat Pirne bekennen —, daz wir mit wolbedochten eyntrechtgin rate vnser aldenn rates vnd vnser eldesten vnd der ganczen gemeyne arm vnd rich, dy sich dez eyntrechtlich mit vns voreynt, vorwillekort vnd verbunden habin alz her noch beschrebin steit. Alzo daz eyne yezliche frauwe noch eres elichen mannes tode eyn dritteil habin sal in alle sieme gute, daz her hot, wo her daz hot adir welchen enden daz gelegin ist; ouch waz czweyn schepfin wissentlich ist vm gelt, daz nymant do vor gericht kan noch enmag. Dor noch steit dy willekor vm dy gerade alzo. Dy frauwe sal zcu dem ersten behalden alle ere cledere, daz beste bette mit czweyn kossen vnd mit czweyn lilachen vnd eyn deglach adir eyne degke. Vnd waz do me ingethüm ist, sal se dy helfte nemen vnd dy andir helfte sal se eren kindern losen. Ist abir, daz man vnd frauwe keyne kinder mit enander habin, so sal dy frauwe alle dy gerade behalden ane silberin gevese vnd guldien, vnd waz der man zcu sieme